

四庫全書

集部

欽定四庫全書

古穰集卷十六

明 李賢 撰

墓表

通議大夫大理寺卿王公墓表

吾鄉之士顯達者甚衆求其志節介然而潔白自守始終不渝者大理寺卿王公其人也嗚呼公今逝矣年止四十有七可勝痛哉公諱字字仲宏別號厚齋河南祥

符人曾大父敦本隱居不仕大父友德父希哲俱以公
貴贈通議大夫大理寺卿母丁氏封淑人公自幼穎秀
異於羣兒父母獨鍾愛之童卅時從師受業日記萬言
巡撫侍郎于謙一見之曰此遠大器也即遣為邑庠生
正統戊午遂發解鄉闈明年登進士第擢南京戶部主
事剋革宿弊廉能之聲大振都憲周銓時總京儲蔑視
屬吏見公獨敬愛之三載以績最進階承德郎公益砥
勵名節在郎署中特立獨行不顧流俗時郎佐秩滿例

轉正郎吏部以公才能顯著薦陞江西撫州知府是郡地儉民夥素號難治公至以簡御煩闔郡翕然稱頌里有隱士吳與弼以道自高足迹不至城府公欲往造其廬與弼聞之即先詣府謁拜接談竟日乃嘆曰真明府也公益勞心民事凡漁利害民之弊悉罷之吏有奸黠者盜府金自若公廉得其狀置于法衆皆畏服以為神明撫民多商給繻之錢歲計累萬前守皆自取以為當然公曰可以勿取而取之是傷廉也悉以屬官郡治傍

有穴地前守引水畜魚以自給公以土實之為倉儲粟
數萬石以濟饑民郡人題其壁有關節一毫無地入公
廩兩字有天知之句遠邇傳誦宜黃多山虎為患公為
文告神而驅之虎皆遁去金谿有聚眾暴掠者公曰此
吾良民迫於饑餒故耳即開倉濟之眾皆感泣曰真吾
父也即時散去藩臬書公績曰剗繁治劇才識有餘清
白操持纖毫無玷都憲巡撫者上公治行於朝特賜詔
命以旌異之進階中憲大夫天順改元皇上復位首念

方岳重臣為郡邑表率屬廷臣會薦公在首選遂陞山東右布政使時廷議山東累歲不登民皆流移必屬能者撫安之上以璽書托公凡賑濟之策不遺餘力民賴全活者數十萬人明年上念宣府北邊重地宜得憲臣巡撫遂召公為都察院右副都御史以往公至訓練士卒堅完城堡凡芻粟屯田邊備戎務一切便宜處之刻弊刈奸士卒感恩而權貴則不悅矣賴上知公為人譖毀不行未幾兼巡撫大同時石亨與其姪彪皆驟遷高

爵恃寵自肆而大同乃舊鎮之地索取尤橫衆莫敢撓
公獨上章劾之以爲大蠹大奸莫甚於此乞置于法以
消未形之患詞氣剴切聞者嘆服已而亨彪果以奸敗
朝廷益嘉公忠直庚辰丁內艱還家一年上起復公至
京將有南臺之命忽念大理卿缺員持天下之平者無
踰於公遂以命之累章懇乞終制弗獲在任惟以洗冤
澤物爲心清研獄狀務得其情不知案牘之勞形也癸
未春進階通議大夫公質幹奇偉心性剛介慎廉隅重

名節操履端方確乎不可拔事親盡孝處兄弟篤於友
愛自奉甚薄雖居顯貴服食不異寒士視貨財如汙穢
見不廉者若將浼已避而遠之卒之日囊篋罄然無以
為斂上聞訃惻然傷悼曰可惜佳士遣官諭祭其家復
令有司營塋事公平生耽嗜六籍博極羣書為文章根
理趣詩古淡春容有餘味所存厚齋藁藏于家公生於
永樂丁酉五月四日卒于天順癸未七月十六日配段
氏子男三長曰樟次早卒次尚幼女一早卒卜以是年

某月某日歸塋於先塋之西嗚呼公之志氣如鳳凰翔于千仞之上而潔白之操方宋之趙清獻公亦可以無愧矣

亞中大夫陝西布政司右叅政李公墓表

公姓李氏諱源字士澂別號志雲唐宗室燉煌之後五季時避亂徙家浙之寧海遠祖穆宋迪功郎五世祖洧孫宋甲戌進士學者稱霽峰先生元黃文獻公歐陽文公皆出其門霽峰生栗栗生炳炳生塾洪武初以通經

分教華亭陞鄜州同知公之祖也卒塋華亭子孫遂為
松江人塾生志剛永樂中禮部尚書兼左春坊大學士
公之父也母孫氏生公自幼穎敏為父母鍾愛稍長即
能文永樂中領鄉薦登甲辰進士時宗伯公以陳漢王
叛繫獄聞而喜之作書以戒公晨夕展誦必泣下嗚咽
是年秋仁廟嗣位釋宗伯公為通政尋出知興化府以
優餘年公得侍行奉親之暇不廢問學宗伯公卒于官
喪塋盡禮宣德庚戌服闋至京擢吏部驗封主事尋署

員外郎滿考為真正統甲子用薦陞浙江布政司左叅議人或不滿望者公曰藩佐非輕在吾足矣是歲浙東旱公曰此非安寢時也即出巡視災雨隨降民皆擁道懽呼自是方伯憲長莫不加敬而巡撫大臣凡清軍提學勘治審獄諸務悉以屬之公理斷各得其宜戊辰冬閩賊大起處務諸郡乘勢亦亂衆議推公往守金華公慨然當之至則獎勵兵民欲重賞以鼓其勇為同事者所沮幾至敗事公又言朝廷錢穀所仰給者在此數郡

今日之事誠不可緩使此賊如宋方臘也即日進軍克銅鼓巖據要地賊既失勢使人來覘公獲之斬以徇賊始懼以退諸郡賴之以安時朝廷命將出師總戎監軍知公之能以諸郡兵民數萬屬公統之公率其家人子弟悉出行陣曰吾門累世簪紱叨竊國恩多矣圖報涓埃在此一舉凡十有七戰馘賊甚衆招輯流民數萬總戎上其功適公述職之際有譖於都憲者乃中以事罷還天順改元皇上復位始白公寃復其官改陝西至即巡

邊撫民仍理軍政時歲歉民饑邊餉缺供守臣上疏舉
公董其事上可之進公右叅政公益盡心區畫期副委
任巡歷郡邑至秦州遇暴雨成疾而卒天順癸未四月
二十七日也距生洪武辛巳正月十四日享年六十有
三公為人和易謙恭篤於友道且好施予或遇婚喪不
能舉者輒分財以賙給之不與物競方被譖家居惟課
子孫讀書足迹不至城市賓友至輒具酒殽笑談終日
無憾意及在任得疾嘆曰吾非不樂山林者第以荷上

擢用邊事方殷豈可遽言吾私竟至不起所著志雲集若干卷藏于家配盛氏封孺人側室尤氏劉氏子男五人長曰桓南京前軍都督府經歷次曰楷國子生次曰概次曰果次曰柰女四人長適監察御史張璠次適汀州知府陸澂之子數次適陝西副使姜濬之子泰次在室孫男六人女四人楷等卜以某年某月某日歸葬某山之原乃以狀來泣請表其墓嗚呼公予僚友也感傷故舊情不忍辭乃投淚而書之使後世有考焉

中憲大夫太僕寺少卿金公墓表

公諱弼字輔伯姓金氏世為江西新淦族曾祖仲卿
祖守正臨江儒學訓導學者稱雪崖先生俱贈資善大
夫太子少保禮部尚書兼武英殿大學士伯父幼孜永
樂中文淵閣大學士歷洪熙宣德又以已所歷官推恩
三世卒贈榮祿大夫少保謚文靖父幼孝贈中憲大夫
太僕寺少卿母劉氏贈恭人公自幼警敏不凡先生長
者咸異之年十六喪父知自力學與兄故兵科給事中

昭伯並擅時名以禮經魁鄉薦登宣德癸丑進士第正
統改元擢中書舍人秩滿以績最陞太僕寺丞天順改
元進少卿累階中憲大夫初公為中書舍人尚寶少卿
袁中徹獨傲公公具言其過遂置于理竟坐罷去兵部
建議擇太學生善書者書武臣誥已得請矣復有以歲
月久近論之者公上疏以為若是則不善書者亦得濫
預詔是其言為太僕丞時北敵為患公建言選將練兵
數事多采行之為少卿慨然以馬政脩舉為已任屢奉

命督理虧耗者自衛使郡守而下悉聽決無不畏法感德有順聖川者水草甘肥永樂中嘗牧馬蕃息天順初屬公往視定築二城用養天閑之馬增二驛於中道以便往來凡百利害悉條陳以聞詔嘉納之公每歲往理馬政不憚勞動壬午冬忽得寒疾猶強視事癸未春疾甚還京遂不起實三月十五日也距生永樂癸未閏十一月七日享年六十有一公孝友之行出於天性痛父早世每遇時祭哀戚不已嘗迎母於京邸就養務得懽

心拓地築室以居宗族弟姪作詩規戒子孫無不備至
在京師買棺助人不能塋者凡十數恤貧濟難恒恐不
及可謂君子人矣配孔氏累封恭人側室尚氏張氏楊
氏子男四人長弘經次弘倫早卒次弘紀郡庠生次奇
尚幼女四人長適廖方鼎次適訓導尹嗣禎次適刁石
次適蕭漢從孫榮將扶柩以歸卜塋于鄉某山之原以
祭酒劉益先生所為行狀乞予表予與公為同年友故
不忍辭而次其事使勸諸墓上之石焉

遵化衛指揮僉事贈昭勇將軍馬公墓表

公諱索珠其先居朔方元有天下都燕入居薊州遂為遵化人曾祖瑪穆特仕元為中書左丞祖達實密為達魯噶齊從祖托和齊為開府儀同三司太尉錄軍國重事父阿勒坦為明威將軍公性資英敏體貌魁竒自幼從事詩書尤閑於兵法仕元為樞密院斷事暨我太祖高皇帝定天下慨然歸附以武畧見用為兵士之長屬籍振武衛洪武五年調興武才能日著時上夜夢一人長身

廣肩器宇宏偉侍衛左右周旋甚悉問其姓名對曰鎖
住馬明日即命羽林百戶潘雄宣訪於衆乃得公曰鎖
住馬者公之號也視其狀貌脫如夢中所見上喜而異
之特陞鳳陽中衛指揮僉事因號應夢將軍時十八年
正月二十七日也未幾從師北征大寧遼東至金山復
從征龍安一渡河一迷河追擊納克楚及平大寧和中
俾守大寧前衛復征捕魚兒海子哈勒哈累立戰功賚
與甚厚特賜誥命二十二年顧遵化為喜峰口要路逼

近邊境以公熟知地勢遂調遵化衛復賜誥命公乃練士卒脩武備於龍山之南構屋數椽戎務之暇與親兵者舊會聚為樂延章縫之士討論古今成敗得失人才賢否不以富貴驕人四方文人才士莫不聞風而至公益虛心下問故其識見大過於人及太宗文皇帝興靖難之師公首從之奮力鼓勇以自效遂死於敵上深憫之錄其孫榮為指揮同知公生元至正辛卯七月二十三日沒洪武己卯七月十四日得年四十有九配馮氏

贈淑人合葬龍山之南子男一日祥與公同沒於陣孫男一即榮也既受蔭敘正統己巳以才能進都指揮僉事充右叅將協鎮薊州永平山海等處乃以公死國迄今六十一年而墓未有表大懼功行莫白於世以鄉人崔富嘗守吾鄧託請文於石辭弗獲為述其槩而系之辭曰有赫前人勝國名臣歷世罕倫公也華胄匪襲其舊挺然獨秀初以才雄精神上通擢任兵戎屢督戰騎轉守邊地益思盡瘁皇起于藩公屬橐鞬卒喪其元有

孫洵武克繩其祖作鎮東土龍山之陽刻此銘章百世之光

奉政大夫浙江按察司僉事彭君墓表

君子坐累既白而卒于以見天理之有在也向使未白而卒君子之心固無愧怍怨尤于其間而世之為善者怠矣安福彭君君子人也不幸坐累逮至京師所枉既白寢疾十日而卒天理於是乎不泯君諱貫字進唯一齋其別號也家居智溪其先出番陽曰忠泰仕宋為吉

州判官因家於安福曾孫曰廉訪使仕益廉訪子曰轉
運使國祥轉運十世孫曰復安以同族曰伯樞者無後
以其子同升繼之即君之父也以君貴贈刑部雲南司
主事母郭氏贈安人君自幼秀爽不羣父兄咸異之稍
長篤志進學遂領鄉薦登正統丙辰進士明年冬擢刑
部雲南司主事是司獄繁多滯君蒞任旬日剖決無留
難每於燈下詳讞其室人曰勞心如是彼罪人者安知
之君曰吾盡吾心耳有盜伐山陵樹君驗其去陵遠遂

薄其罪有中官獲盜送鞫欲掠殺之君曰吾豈可殺人
以媚人哉卒處以常典有夫婦犯法當俱死君憐其一
子在抱出其婦凡斷獄平恕多類此尚書魏源深重之
源去囚反獄金濂為尚書以為典獄者私弊所致委君
整飭乃得贓狀者奏謫戍邊自是防範始嚴歲癸亥用
濂薦陞浙江按察司僉事督理屯田君見餘田多荒由
子粒之輸與正同乃奏請遞減餘丁民人之輸田遂不
荒孔氏在衢者家廟如闕里元賜田以供祭國初由偽

姓罪累田盡入官君奏請復給嘉湖水災朝廷遣官覆
實君遍履視之計虧常賦數十萬君曰為民獲罪尚何
恤邪獨具實以聞遂免徵尋丁外艱服除復任景泰庚
午受勅命推恩及親時處州盜起御史李俊督兵挫其
勢有嫉之者反誣奏之事下守臣都御史軒輓以君公
直檄往廉之卒釋其誣復屬理軍政凡詭籍妄附者悉
正之洎詔恤刑復委君案閱可矜疑者皆得不死所至
興學校正風俗除奸弊民皆悅服按察使陳璇禮君獨

異由是同官多忌之或譖於都御史洪英乃求君與璇之瑕考奏左遷君不與辯力以疾辭還家浙人數百上疏乞留不獲璇既得辯英坐是被劾而去君居家怡然自得時徜徉山水間世事一不挂口天順己卯用子華貴復受誥命進奉政大夫脩正庶尹及卒于京師凡卿大夫士莫不悼惜咸往哭弔君平居孝友事父母處昆季咸得其懽天資剛明而器度高邁臨事立決確然當理是非成敗常預料之後皆不爽尤善別人物高下暇

則書史不釋手為文以辭達為主從學者甚衆卒年五十有三天順庚辰十二月十一日也配伍氏有淑德累封宜人子男四人長曰禔克家不仕次彥充禮部儀制司主事次華翰林院編脩俱以進士發身次禮邑庠生女二長適劉某次適劉某俱名族也禔與華扶柩將歸塋于故里乃以君從子學士時之狀乞子為表刻石墓上予不獲辭乃述其槩而系之以辭且以為世之力善者勸辭曰安城之彭世遠而芳簪組相繼後先爭光有

卓嗣人明時奮翮偉績賢勞世豈多得樂天知命曾不
尤人橫逆之至我心無嗔數之乘除乃豐厥後益振家
聲自天之祐眷此善行匪溢其詞刻諸堅石終古不移

中議大夫黃州知府致仕滕君墓表

記曰親有善而弗知不明也知而弗傳不仁也况為人
子者其孝在於顯親揚名者哉都察院左僉都御史滕
昭痛親之俱逝手述其行乞予表其墓予哀其用情而
不忍辭按狀滕君諱霄字九臯其先開封鉤州密縣人

元季避兵徙南陽之汝州曾祖公甫祖貴父興俱潛德
弗耀君自幼天資穎秀為州庠子弟員永樂初貢入太
學久之擢禮部司務陞祠祭員外郎有精勤之譽歲丙
申用薦陞湖廣黃州知府抵任以寬厚為政民有爭訟
者諭之禮義興學鋤奸政聲翕然黃岡之民訴有虎害
君為文告神虎即遠去宣德中行部至麻城有訴勾軍
戍士為人殺死不白者君宿城隍廟廉之見一刺鼠走
入寢處盤旋而去即使人追之至一池塘潛伏不見掘

之得屍即戎士也因獲所謀殺者遂正其罪遠邇驚異
郡之獄囚一訊而決未嘗久繫人多德之九載秩滿黃
民不忍釋去上章懇留詔令復任君益勞心撫字惟恐
一民不得其所在黃凡十有八年而廉潔之操如一日
甲寅歲乃引年致政而歸閉門甘守淡薄如未仕時正
統改元三月三日以疾終于正寢距生吳元年二月三
日享年七十太恭人程氏克盡婦道隨行仕途佐以勤
儉君卒後家無儋石之儲太恭人孀居獨持門戶凡百

所需皆出勤儉之力有售書者過門輒脫簪珥易之以
授昭曰讀此可繼父志也昭甫成童遣為郡庠生遂領
鄉薦授監察御史乃迎太恭人就養京師每戒昭曰爾
父居官始終廉潔爾任憲臣尤當淑慎況吾平生不喜
華靡勿以我故而較豐約昭奉命惟謹天順己卯以昭
貴乃獲勅封祿養方殷忽遭一疾惟顧謂昭曰汝能輸
忠報國不墜家聲吾瞑目矣言訖而逝癸未十一月二
十三日也距生洪武丁卯九月十七日享年七十有七

滕君先配李氏早卒贈恭人太恭人其次室也子男二人長曰振次即昭孫女二人長適貢士郭昇次幼在室孫男五人昭扶柩南歸卜以明年某月某日合葬杏園之南岡嗚呼滕君夫婦善行豈不足以為邦人出仕者之所取法哉是為表

朝議大夫國子祭酒劉公墓表

高官大爵有才能者皆可為之而祭酒則不可為蓋必學行老成足以為人取法者斯稱其任焉天順己卯祭

酒缺員朝士大夫中拔而用之非不近且便而必求於數千里之遠外若劉公豈非學行老成者之難得乎方哭公之亡而公子溥請表其墓同年之好不可孤也按司業張業狀公諱益字崇益別號覺菴先世安成人後徙吉水曾祖某號章江祖某號村老俱隱德弗耀父宗平號拙菴四川大寧儒學教諭為學士解縉所知薦脩永樂大典書成陞翰林檢討母解氏即縉之從女弟生子三人公其仲也自幼穎悟好學弱冠游邑庠從前

司業曾暹受易經知州柯暹來掌縣事見公勤力不怠
獨加獎曰此必異日名士也宣德壬子遂中鄉試第四
人登癸丑進士第正統改元授兵科給事中戊午弟觀
復中鄉試第一人登己未進士第兄弟同朝士林榮之
尋以山西久旱命公往祀河瀆西海之神祀罷大雨人
以為至誠所感六年以績最賜勅命推恩及親乙丑持
節冊封周王有所贈遺悉卻之不受既還聞母喪塋祭
一遵古禮服闋改刑科給事中己巳秋敵逼京師人心

危懼公疏陳禦敵策朝廷嘉之即命公往募山東諸道
民丁習武藝以備調遣人皆倚以為安是歲冬以公勞
績陞湖廣布政司左叅議時興師征苗山川險阻所慮
者督運軍餉同官難其行公曰地方失寧咎可逃乎乃
毅然當之襄事而還時御史出巡歸者必劾方面之不
職於公不惟無疵可擿且疏其為政寬猛適中得民心
上特賜誥命以旌其能仍推恩及親天順己卯用大臣
薦召為國子祭酒公以師為司業弟子為祭酒不可欲

固讓之至則遲已致仕矣公既蒞事乃申勅學規作興士類諸生翕然從之天順癸未十二月十有六日以疾卒距生洪武壬午三月二十九日享年六十有二配徐氏封恭人子男三曰澡早沒曰溥曰濬女一適周仁達孫男二曰機曰梗公偉貌脩髯容止典雅望之可知為儒者師然篤於孝友性度寬和橫逆之來未嘗與較有加誣者亦不復辯待其自明人以是多之作文理為主辭意條暢尤好吟詠音律清淡亦工翰墨字畫適美求

者接踵於門所著覺菴集若干卷藏于家卒之日上嗟
悼遣官諭祭公卿大夫咸弔哭之嗚呼公之儒行足見
重於世有如此者予故次第其事而授溥使歸刻諸墓
石以示後人

復齋焦先生墓表

翰林庶吉士焦芳持其祖之行實謁予告曰吾祖儒行
可述非得重世之文第恐不白于世敢以鄉後學請于
下執事者予憐其志而為之表云先生諱顯字宗仁復

齋其別號也世家南陽之泌陽曾祖某仕元為萬戶抗
志不合即棄官歸隱而終祖良輔父成俱樂志不仕母
董氏有淑德先生自幼不凡穎敏端重為父母鍾愛出
入攜之口授古訓輒成誦稍長遣入邑庠為弟子員勵
志讀書師友莫不許可時泌久乏科目咸屬先生適以
內艱居家服制將闋有司強起之不從永樂甲午遂登
鄉科明年春闈中乙榜有勸辭之者先生曰命也當順
受之擢易州儒學訓導恒以不任為懼雖束脩之禮不

苟納邑之材士賴其啓迪率多成人永樂甲辰秩滿以
績最選擢韓王府教授輔導宗藩其任益重先生亦竭
心力不少怠久之曰人生貴適意耳吾何戀於此遂上
疏乞骸骨時宣德丁未先生年纔四十有五人或以為
太早先生曰早圖晚節古人所尚竟得請以歸營別墅
於泌城之西去家數弓許為屋若干楹繚以周垣蔭以
佳木園池蔬菓觸目成趣日與鄉之故舊幅巾藜杖徜
徉容與於其間且曰向為儻來之物所絆今始復吾此

樂耳為人簡易寬厚初無町畦處父兄宗族鄉黨間無
不得其懽心見孫芳聰秀俾入邑庠曰是能繼吾家聲
者已而果領天順己卯鄉薦時先生年七十有九喜曰
老夫含笑入黃泉矣至八十有一乃卒天順辛巳三月
六日也配武氏繼吳氏俱先逝子男五人長宣次溫次
朗次舉次鑑孫男十一人曾孫男二人是月二十日與
武氏合塋于泌城西南先塋之傍系以辭曰泌之儒先
不多見也有美復齋焦之彥也粹行清文心罔銜也啟

迪輔導力不倦也晚節端歸適所願也別墅徜徉名鞅
之弗戀也考祥視履闔邑之獨擅也昌厥後人不掩其
善也我勒斯銘永為鄉人勸也

長樂林表

吾族上世遠不可考其在宋有兄弟四十八人自後子
孫屢遭兵革不能自存於是棄家走四方各避害以全
性命而已國朝洪武初惟先祖少保府君來守祖塋鳴
呼以四十八人之後無慮千百指豈料守祖塋者僅存

一人吾族之衰未有甚於此時者也已而先祖乃生三子于今孫枝又漸盛焉賢竊官于朝推恩三代曾祖祖父俱光祿大夫柱國少保吏部尚書兼華蓋殿大學士妣皆一品夫人蓋盛極而衰衰極而盛一理勢之自然耳雖然盛極而衰之家不再盛者多矣吾族既衰而復盛得非前人積德之厚歟譬之水焉淵之深者流必遠或暫阻焉終不害其遠也譬之木焉根之固者發必茂或暫困焉終不害其茂也吾祖之墓去鄧六十里號曰

長樂林者自宋以來然也吾髮未燥時每隨父兄往拜
掃焉但見叢木脩竹屯雲蔽日中有數墳累累相向吾
於斯時茫然不知本源之義也洎為諸生讀書講道心
始開明歲時拜掃之際方思先世盛衰如此亦不慮及
表而著之也未幾出仕于朝三十餘年思欲表之亦莫
之就而且於勢有未便者今也始克為之蓋其志之堅
情之切思之久成之急有不可得已者第恨為之已晚
難免不孝之罪或曰昔歐陽公為瀧岡阡表蓋卜葬其

親已六十年矣且曰非敢緩也盖有待也今子塋其祖亦三十餘年而始為之抑豈非有待之云乎是大不然吾於初時何恃而待但其為表乃在恩典極隆之後亦若有待焉者盖事之適契豈敢上擬先正哉嗚呼後世子孫誦此刻文可不惕然懼其衰至而思有以繼其盛乎欲繼其盛豈有他哉惟脩德行義而不虧焉可也噫可不慎歟

古穰集卷十六

欽定四庫全書

集部

古穰集卷

十七至
二十

詳校官編修_臣翟槐

中書_臣劉源溥覆勘

總校官原任中允_臣王燕緒

校對官中書_臣李棻

謄錄監生_臣官懋弼

謄錄監生_臣陳元熙

欽定四庫全書

古穰集卷十七

明 李賢 撰

墓誌銘

奉天翊衛推誠宣力武臣特進光祿大夫柱國
文安伯追封文安侯諡忠僖張公墓誌銘

今世勲臣之盛無如張氏一門蓋永樂初靖難之臣雖
衆而功之著者河間定興兩王也天順初翊戴之臣雖

多而功之著者文安太平兩公也嗚呼張氏父子兄弟
四人咸建非常之功此所以享福祿榮名于當世與國
咸休也與文安之終其子斌前期來請塋銘按狀公諱
輓字文端河南開封祥符人父諱玉贈奉天靖難推誠
宣力武臣特進榮祿大夫右柱國榮國公追封河間王
謚忠武母王氏元判樞密院事執中之女追封河間王
夫人生三子長諱輔奉天靖難推誠宣力輔理佐運武
臣特進光祿大夫左柱國太師英國公追封定興王謚

忠烈仲即公天順初自太子太保兼中軍都督府右都督進封奉天翊衛推誠宣力武臣特進光祿大夫柱國文安伯追封文安侯謚忠僖季諱軌奉天翊衛推誠宣力武臣特進光祿大夫柱國太平侯追封裕國公謚勇襄公自幼聰穎動止不凡六七歲時即能習禮儀讀書史悉通其大義稍長益力于學不尚紃縠之習河間王早已死國公不及逮事事母夫人尤篤愉色婉容可方古之達者敬禮其兄若嚴師焉於弟尤盡友愛之道親

賢取友樂善不倦由是上下皆得其懽心母夫人特鍾
愛之永樂中以勲臣子入見文廟奇之特授金吾前衛
指揮使歷長陵神策兩衛公益淑慎自將大獲時譽正
統初今上念公父兄之功且姻聯戚里進錦衣衛都指
揮僉事日侍經筵十四年以勞勩陞僉後軍都督府事
領禁兵宿衛蓋以公勲戚故託以心膂之寄也尋加太
子太保又進兼中軍都督府右都督公益必懋小心夙
夜在公務竭忠盡所部將士咸畏愛公而不敢犯天順

改元上復位公首以翊戴之功封伯食祿一千三百石
子孫世襲賜以誥券仍典宿衛兼都督府事三年以老
疾乞謝事上念公宿德特許優閒調攝且命醫專視資
予有加時致存問五年冬上思公欲一見特遣中貴人
賫寶鏐三千緡及白粲羊酒等物往賜公且道意遂力
疾強起入見上甚歡顧問良久命公仍典宿衛寵眷彌
隆六年春忽疽發于背自謂不可復起乃上疏言臣本
庸謬遭遇聖明安享高爵方圖報稱奈何大數止此惟

皇上以宗社生民為念任賢治理用臻康泰臣瞋目於
泉下矣他無所請上惻然以手詔諭公曰覽卿所言忠
愛可嘉今卿疾勢雖篤尚加調護以副朕意即日遣中
貴人賫白金百兩往賜之命至而公薨矣實二月三十
日也距生洪武庚午二月一日壽七十有三訃聞上震
悼輟視朝一日追封賜諡及賻儀悉從厚典遣禮官諭
祭工部治墓事公之死生可無憾矣公風姿清偉辭氣
雍容接人謙恭絕類儒者暇則閉戶觀書為盆池聚石

襍植花卉以自適賢士大夫至則倒屣出迎講說道義
亶亶忘倦性不嗜酒而待客務盡款洽尤好吟詠於凡
古詩無不熟覽亦敬禮方外之士內典丹書悉得其肯
綮教子務循禮法而治家尚儉所居賜第未嘗增新見
孤貧者必傾財以賙之俾得所而後已聞人之善稱道
不釋口有不善則避之以故人人企仰而被其容接者
自以為幸噫勲舊戚里門第之高爵位之隆求其清聲
雅望如公者豈多見哉公配侯氏有淑德累封文安伯

夫人子男四人曰鑑曰瑄早卒曰斌為勲衛即繼爵者
曰昌女三人一適後軍都督郭英一適保定侯梁瑋一
適李王孫男四人曰亨曰洪曰淳曰清斌等以是歲某
月某日奉塋于都城南盧溝橋之西從先飛也銘曰勲
戚之家有美張氏父子弟昆以續以似惟忠僖公志行
尤敦不矜以驕侃侃王孫左公右侯惟我同母篤是天
倫惟孝惟友薦膺帝眷時譽孔昭帥兵宿衛遑恤其勞
翊戴之功在公尤偉爵與功崇介此繁祉公也危懼翼

翼小心謝病斂迹深淵是臨帝起復公橐劍甲冑相古
先王人惟求舊忠誠允蹈之死弗渝懿哉行實允宜特
書洸洸武臣公為稱首勒銘堅珉千載不朽

資善大夫刑部尚書劉公墓誌銘

劉之先河南祥符人其遠祖有曰功甫者仕宋為江西
萬安丞子孫因家焉自是以來宗支蕃衍代有顯宦具
劉氏家譜公諱廣衡字克平曾祖仁一祖昭年父俊英
俱業儒不仕祖父以公貴累贈資善大夫刑部尚書祖

妣鄭氏妣歐陽氏累贈夫人公自幼穎敏在醜夷中卓異如老成早失怙恃遭家多難諸弟幼弱公與兄廣泰綜理家務家遂以振閭里莫不嘉美曰劉氏有子矣洎長入邑庠授易于鄉先生翰林檢討宋琮永樂庚子遂領江西鄉薦益肆力於學登甲辰進士第宣德戊申拜刑部廣東司主事乙卯陞陝西司員外郎正統丁巳再陞浙江司郎中凡歷三署廉明之譽翕然庚申秋朝廷軫念四方多罹飢饉欲廣蓄積以禦荒歲乃簡廷臣分

理預備之政勅以便宜從事公在首選往浙江即日上
道遍歷郡邑所區畫甚多得粟數百萬石為四倉以儲
之復督勸有司築陂塘抑豪強拯困弊事集而民不擾
既還朝廷嘉之甲子陞陝西按察司副使命專理重刑
凡疑獄賴公而明者甚衆己巳陞陝西布政司右布政
使明年上以陝西邊務方殷特陞都察院右副都御史
鎮守關中公益感激自效條陳數十事皆安邊禦敵利
國便民急務多見施行時邊報多警公從容裁處咸得

其肯綮督脩城堡七十餘處復奉勅轉輸軍餉數萬石於邊城適歲旱民饑因設法濟之俾不失所而公家之務亦辦尋召公還京治院事未幾復命往錄南京法司之獄多所平反既還有白金綵幣之賚壬申秋復奉命糾察湖廣庶職之廉貪者凡所黜陟人服其公且條陳軍民利病數事多見采納既還勞以羊酒時福建浙江民鄭懷冒王孝心等作亂特勅公馳往督兵捕之至則賊已就擒公察其嘯聚之故以山有銀場連亘深僻賊

得以潛伏其中即命伐山通道且奏設縣治以便巡視
其患遂息已而守臣以所獲賊屬俱論謀逆報功希賞
公覈其實得首惡者十人餘悉縱之事竣而還賜白金
綵幣甚厚丙子復奉勅巡撫遼東提督軍務鎮靜不擾
遠近悅服天順改元春皇上復位特召公還陞刑部左
侍郎八月遂進尚書累膺金帶綉袍之賜公感上知遇
益自力以圖報稱秋九月忽遘風疾而瘖即上章懇乞
骸骨詔許之既而言語如常衆醫皆喜曰公疾瘳矣公

獨不以為然惟諄諄屬後事未數日疾果復作竟不起
天順二年十二月十五日也距生洪武某年某月某日
享壽六十有四上聞訃嗟悼遣官致祭于其家復命有
司為營葬事公為人直諒通敏寬厚坦夷處已接人一
出於誠不立崖岸平居溫然和氣可掬及遇事能斷毅
然不可奪而廉介之操始終不渝雖歷通顯服食無異
於寒士尤以文學推重於時所為詩文有集藏于家娶
康氏累封夫人子男四曰述古曰述憲中順天府鄉試

曰述某曰述績為邑庠生女三長適歐陽聰次適蕭欽
訓次適王鴻孫男二孫女四銘曰葦有松焉挺然秀拔
石有玉焉孚尹旁達大江之右懿此劉公卓卓溫溫如
玉如松發跡司刑爰歷三署巨臬名藩大有時譽都臺
薦升司寇載登既忠以勤皇寵是膺惟德之厚惟才之
長惟學之富懿此劉公邦家之光胡不慙遺皓首巖廊
我懷伊人昭代稀有刻銘堅珉永世不朽

中憲太夫大理寺左少卿李公墓誌銘

庚辰歲暮上將時享太廟前期詔百官陪祀者皆致齊
大理李公與其僚友同宿公所夜談二鼓盡乃寢至五
鼓將趨朝訝公久不起視其寢曰死矣傍無綱紀之僕
京邸寥寥殆無以為殮嗚呼悲哉踰數月其長子匍匐
而來泣請銘予與公同朝久相知又稔不復辭按其友
國子祭酒劉益先生狀公諱茂字茂萼唐西平忠武王
裔也忠武七葉孫曰祖堯始徙吉水之谷坪至十七葉
孫人傑復徙縣治學宮之東公曾祖諱永吉祖諱文泰

俱隱弗仕考諱伯葵以公貴累贈奉政大夫大理寺丞
妣劉氏贈宜人公二歲失恃母氏撫育之成童見其天
資穎異俾從師講學學大進有司選為邑庠生益勵志
不懈宣德乙卯以易經領鄉薦正統己未登進士第尋
丁內艱哀毀踰禮鄉人稱其孝釋服擢大理評事獄
平恕有聲遂授勅階文林郎己巳用廷議陞寺丞景泰
初以南京舊都諸司庶政多怠弛特勅公按行至則考
覈百司而黜陟之審錄獄情而伸理其枉事竣乃還初

衆以公為晚進當此重寄慮或不勝既而舉措得宜如
碩望老成者始加嘆服尋上治兵安民救時急務凡八
事多見采納賜誥階奉政大夫未幾進右少卿乙亥復
奉勅錄南京法司殊死已上獄俱得其情聲譽益振時
南京大理缺人遂命公掌寺事天順初召還進左少卿
公愈益盡心刑事復受誥階中憲大夫遂至不起公天
資淳篤操履端慎孝友之行著于鄉邦而性尤尚約所
得祿入計一身用度悉分以奉諸兄及賙宗黨之孤乏

者平生不喜以賢知先人雅度雍容僚友莫不愛重為
文典實類其為人死之日喪具不備衆為之鳩金以助
朝廷聞訃遣官諭祭於其家公生永樂丙戌十一月十
八日卒於是歲十二月二十七日得壽五十有五配鄒
氏累封宜人子男二長曰全次曰奇女三長適某次適
某皆名家子也全扶柩南歸卜以某歲某月某日塋於
某原為之銘曰惟家之約乃士之常惟公起家以約自
將奮自布韋歷登顯任祿入之餘宗黨是振宅心仁恕

獄多平反慕于與張曾不憚煩惟德之原曰孝曰友公能充之宜臻永久今胡不然有命在天公雖往矣清譽綿綿

鎮國將軍錦衣衛都指揮同知孫公墓誌銘

公諱顯宗字光表別號澹樂世居濟南之鄒平故會昌伯贈太傅安國公謚恭憲忠之子今太保會昌侯繼宗之弟母董氏安國夫人張氏其生母也公自幼俊爽異人居常幹蠱太傅之為永城簿公侍行太傅蒞政時公

即扃門自守不納私謁太傅竒之以為有子已而董工
脩山陵不以家務累心蓋倚公也宣廟為皇太孫時冊
公女兄今聖烈慈壽皇太后為妃宣德改元正位中宮
上命中貴人劉寧取公昆弟至京入見上喜公動止詳
雅以為府軍前衛指揮同知賜錦綉衣一襲宴于宣武
門賜第宅一區于東華門左公嘗隨侍習武藝上見公
騎射精熟又大喜賜以珍禽一日上取魚于太液池分
賜公昆弟烹食之次日公不至上曰得無以魚骨梗之

乎及公至果以是對上大笑曰偶爾中耳正統改元以公昆弟至戚待之愈厚己巳秋車駕北征命公留守公夙夜弗倦屢獻良策景泰改元有小人貸公白金不償反造謗言朝議欲陷公且密緝之公坦然略不介懷久之事乃釋天順初公與太保暨昆弟子姪同迎英廟復位特賜勅褒獎陞都指揮僉事累賜金帛楮幣蟒龍麒麟袍服尋陞都指揮同知食祿錦衣衛天順甲申十一月十七日以疾卒距生永樂戊子五月十二日享年五

十有七公荷列聖眷顧之隆三十餘年小心翼翼未嘗
敢以貴富驕人雖在優閒日勤朝謁為人慷慨讀書好
義居家孝友安國夫人喜公勤誠鍾愛之無異已出每
退朝昆弟會于一堂怡怡終日子孫眷屬多至數千指
無乖爭者性樂施予婚人之男嫁人之女舉人之喪不
一而足屬纊之際無他言惟顧其二子曰勉盡忠孝訃
聞上哀悼遣官諭祭於柩前復令有司為營塋事公娶
李氏繼丁氏再繼吳氏俱封淑人生子三長曰琥早卒

仲曰瓏季曰瑤俱錦衣衛千戶女三長適神策衛指揮
李謙次適散騎舍人郭嵩次適寧遠伯孫任勇孫女一
在室卜以成化元年二月十一日塋香山之原從先兆
也銘曰貴富常情驕奢自至有不驕奢孰尚其志懿此
孫公安國是承不侈不矜澹樂自名豈惟澹樂篤是孝
友賙貧恤孤惠亦多有譽隆戚畹孰如公門惟弟惟昆
惟子惟孫公今已矣世澤有繼我銘其藏永永無替

中奉大夫湖廣右布政任公墓誌銘

公諱禮字敬讓別號澹齋世居西江之豐城前人歷有
顯宦有至司空樞密副使者七世祖陸呂登宋景定進
士官大理評事祖原傑以上多隱不仕父載遠以公貴
贈朝請大夫河南布政司右叅議母鄭氏贈恭人公自
幼穎敏為父祖鍾愛稍長從明師遊力學不倦永樂庚
子以詩經領鄉薦遂登辛丑進士時二親尚無恙間得
請南歸扁其堂曰順親鄉人榮之越三載召至京遣持
節冊封楚王禮成而還凡王府金幣之賚俱弗受文廟

對廷臣屢嘉獎之宣德丙午擢工部營繕主事司素號繁劇公至理之裕如尚書吳公大奇之由是闔部章奏移文必經公然後行戊申奉命取淮浙工人四千餘赴京公持法雖嚴而撫諭甚至未有一後期者同行五人皆以悞事黜惟公得譽特賜勅進階承德郎時議欲脩宮殿者僉曰此大事也非採辦於四方不克成惟公久在營繕知所積足用與否乃召公問狀公上章極言其不便遂免採辦事竣朝廷賜綵幣以旌之甲寅以秩滿

陞郎中勤慎之操愈勵正統戊午丁外艱服闋用薦陞
四川布政司右叅議善政甚多流移之民得公招撫而
復業者八千餘時雲南貴州播夷不靖連歲興師公奉勅
督軍饟十餘萬斛或遇寇阻不為懼兵以足食師還有
欲論功者公止之曰此亦分內事何足言己巳丁內艱
景泰癸酉改河南值歲凶公振貸于諸郡活饑民數十
萬乙亥春秩滿用薦陞湖廣右布政使給前任誥進階
朝請大夫時苗寇作亂朝廷命將討之督軍饟之功在

公尤多天順庚辰春以老疾致仕方將優游林野以適其所適居三月一疾而逝是歲七月十七日也距生洪武乙亥六月二十日享年六十有六公天性孝友襟懷坦夷急於濟人而薄於自奉其接人也誠不設崖岸居官四十年聲譽籍甚可謂人中之翹楚者矣配周氏繼蔣氏累封恭人子男三長曰善順天府儒學教授次士淵次士霑女二長適萬景同次適黃成章孫男六孫女四善卜以是年十一月某日將奉塋于邑山之原乃以

國子祭酒劉益先生之狀來請銘銘曰先世之澤遠以
長瞻彼後裔如蘭芳有卓其孫才且良讀書起家煒有
光歷躋膴仕奮顯揚佳聲籍籍聞四方薦膺寵錫雲錦
章家庭夙志允已償早圖晚節歸故鄉全歸瞑目邱中
藏嗚呼新阡城下岡太史之銘在幽堂後千百載無毀
傷

奉訓大夫吏部文選員外郎尹君墓誌銘

尹氏之孤曰天覺持其父之行狀泣且告曰愛吾父者

莫厚於執事幸而銘諸墓吾父之目瞑矣噫我知尹君者為銘固宜按狀君諱弼字廷佐號介菴常之宜興人也曾祖俊卿祖伯敏俱不仕以善名一鄉父時中篤儒行居亳溪之上嘗構一軒聚圖書其中扁曰清趣以自適鄉人稱亳溪處士云以君貴贈承德郎吏部文選主事母吳氏贈安人君自幼端謹為父母鍾愛年十八入學為生徒時父母繼沒哀毀過禮里人悲之正統戊午以書經中鄉選明年入太學學益富尋歷事吏部聲譽

勃然聞搢紳間正統甲子春冢宰試其能曰主銓事者
非此人不可乃請於上而授之君益自力期副所知遇
既六載勤慎如一日上嘉之賜勅授承德郎正統丁卯
進署員外郎適東宮初建詔中外之署職者咸即真君
與焉復有白金文綺之賜又進階奉訓大夫方期以大
用而一疾不起矣予昔與君同官交好最久見其處已
待人一於謙恭不少懈言若不出諸口而勤於職務人
莫能及盖訥言敏行之君子也為詩善古選有漢晉風

味尤精於篆刻好蓄書畫適趣於琴性不嗜酒而喜延賓客此其高情出於塵表夫豈流俗所能測哉君生於永樂丁亥八月十三日卒於景泰甲戌正月某日享年四十有八娶吳氏封安人子男四人曰天民天覺天常天秩女二人幼在室天覺等將歸塋於其鄉某山之原銘曰以德則壽以命則乖從古則然豈惟君哉嗚呼玉之佳在乎無瑕君之德百世之誇藏之于幽而不泯者有燧其華

奉政大夫南京刑部郎中鄭君墓誌銘

予正統初聞錢塘鄭君為兵部主事有能名而未識也
間邂逅相遇接談之頃始悉君才識副其名君亦待予
若素交者未幾君以薦陞而去久之不相聞則君已謝
事歸矣天順庚辰廷試進士第三人曰鄭環乃君之子
也予方喜賢者之有後足以慰君一日環忽衰經以來
泣且告曰環父沒矣幸憐而銘之嗚呼予與君豈一日
之雅哉按其鄉人大理寺丞夏時正狀君諱堂字良載

輿齋其別號也君自幼雅飭如老成人稍長從鄉先生
受業奮勵不少懈凡經史子籍靡不涉獵發而為文辭
理嚴切一時耆德宿儒皆折輩行加重莫不喜曰鄉里
不乏人矣永樂中以春秋領鄉薦登甲辰進士第賜歸
于家乃構堂於後圃扁曰樂存以奉親宣德中以外艱
服除擢兵部武選司主事遽理繁劇若素練者時靖遠
伯王公驥為尚書深器重之三年以績最賜勅階承德
郎九年復以績最陞南京刑部江西司郎中君曰今日

之職務尤當盡心者凡理獄訟務加詳焉有以舟行賈
載兵自防者附舟之人因他事忿爭委贄而去誣以強
劫因獲兵具論死君獨疑之鞠審所由事乃得白有甲
乙相毆者乙以病死誣甲故殺既成案君直其枉遂得
減論凡辯獄多類此嘗上疏言獄情數事朝廷多見采
納部長或公出必委君署之尋賜誥進奉政大夫脩正
庶尹一日與長官論議不合嘆曰吾不能詭隨以固位
遂乞休致時景泰辛未年五十有六耳或曰君年力未

衰何去之決乎君曰吾欲留有餘不盡之福以遺子孫
况老母垂白在堂得遂膝下之養何樂如之聞者嘆服
君既居家奉親之暇課子讀書門無雜賓淡然若與世
相忘者預營壽藏于碧梧之原時遊其中其情之任達
如此舊有寒疾忽發會母亦遘疾君遂驚憂不起屬纊
惟以不終養為欠卒在天順辛巳正月一日距生洪武
乙亥十二月二十九日得壽六十有六君為人簡重不
尚浮靡尤寡嗜好有古法書名畫彝器人或持去亦不

顧惜所著有甲辰稿輿齋集措菴集若干卷藏于家君
之先汴人七世祖筠孫仕宋為太中大夫從高宗南渡
居越之山陰曾祖克明從陳旅游錢塘愛其山水之秀
遂家焉祖脩父璧俱不仕璧以君貴累贈奉政大夫脩
正庶尹南京刑部江西司郎中母陳氏累封太宜人配
洪氏封宜人子男四人長即環翰林編脩次璣次璽次
璵女三人長適劉英次適王璋次在室孫男三人孫女
四人卜以是歲某月某日啟窆而窆之銘曰錢塘之秀

鄭君生焉出而用世業光於前惟位於才人不為滿君則泰然兢兢自勉惟彼冥數以乘以除孰如晚節有美令譽我昔會君知為大器今為君銘悲思曷既碧梧之原安此泉宮君名不朽桑海是同

封翰林院編脩文林郎徐君墓誌銘

今之制子官于朝三年即推恩及父如子官蓋人君以孝治天下其典未有盛於此者金谿徐瓊為翰林編脩三年其父即受勅封未踰年而卒嗚呼瓊之父死其可

以無憾矣夫瓊持脩撰黎渾狀請為銘按狀君諱文字
貫通別號拙逸其先世居臨江有栢軒翁者仕宋為撫
郡博士因訪友人吏部尚書吳棨于金谿見柘岡之東
陽谷山水佳甚乃卜居焉遂為金谿人高祖淵尚志明
經與中書左丞危素為布衣交素薦不起鄉人師之稱
松坡先生曾祖昌祖克明俱隱弗仕父邦用性愛竹手
植萬竿作亭其間吟詠自樂因號萬竹翁母李氏繼母
毛氏生子七人君其長也少從鄉先生遊讀書不少懈

或勸之出仕曰非吾志也乃躬耕玄洲之上植有豐產
遂泝江漢遊吳越以有易無而歸曰奉親之具足矣由
是不復出平生所適惟四書義帖每究其義而玩其摹
曰道藝在是宣德間父年高且倦以家政付君君夙夜
任之不數歲貲用倍于前事繼母尤委曲盡孝得其懽
心居親喪哀毀踰禮服盡而情不衰立塾延師以訓族
黨子弟婚娶慎擇所宜以故子姓繁盛幾千百人正統
辛酉歲大饑君慨然出粟千石以助有司賑濟既而朝

廷下勅旌異乃讓其從父邦任景泰壬申復饑君再出粟七百石有司請立石君止之曰濟之以饒名非吾意也鄉有貸者輒應之不計其償里豪有犯君者為其隣搆死婦誣之屬君為證君曰吾聞君子以直報怨遂白其誣有竊君之困諸者君曰我有餘而彼不足無怪其然也盜聞之感悔性嗜酒不為所困不喜奉老釋或以福田利益為誘輒正言斥之貲雖饒裕而自奉甚薄初結屋玄洲號稼菴晚悟機非遂更今號及子瓊進士及

第官翰林嘗勉之曰清慎忠勤四字不可缺一違吾言
非孝子也邑大夫歲時請鄉飲以爵推之輒避不與殆
所謂一鄉之善士者與卒在天順辛巳六月二十五日
距生洪武庚辰四月六日得壽六十有二配黃氏封孺
人子男二人長即瓊次曰瑤女二人長適龔克初次適
楊仁政孫男五人卜以是歲某月某日塋于某山之原
銘曰已能官者才之特也子能官而已受封者德之植
也才足榮乎身而顯名德足裕其後而承式也若徐君

之不仕豈徒云哉抑尚德也嗚呼惟德是尚故報施之
不忒也慶鍾于家鄉閭是則千載之下其德音昭然而
不泯者庸非賴此刻乎

古穰集卷十七

欽定四庫全書

古穰集卷十八

明 李賢 撰

墓誌銘

輔聖莊懿夫人蘭氏墓誌銘

夫人姓蘭氏山後興州人自幼聰淑為父母所鍾愛洪武三十六年年二十有六被選入掖庭勤慎小心容止端重宮闈之譽藹然歷永樂洪熙宣德正統奉宸侍御

凡五十有九年不懈如一日亦未嘗有毫髮過舉而寬裕和柔之德著於上下累朝眷注之隆莫與為比用是受封輔聖夫人天順四年閏十一月二十五日一疾而逝距生洪武九年四月二日享年八十有五訃聞皇上為之哀悼不能已六宮無不痛惜一日上召臣賢曰輔聖夫人實朕之保母卿須加意為諭祭文臣賢奉命惟謹翌日遣官行禮謚曰莊懿贈賻之儀悉從厚典復命有司營葬事以內臣一人掌喪中宮以下罔不弔祭其

生榮死哀之盛可謂千載一時者矣夫人從子曰清以
夫人貴特授錦衣衛正千戶卜以今年十二月某日窆
於西山某地之原乞予為銘納諸墓中予以夫人之德
之功何可以不銘銘曰猗嗟夫人負此秀質入侍宮庭威
儀秩秩明明列聖咸用爾嘉曾不恃恩寅畏彌加保我
聖躬益殫厥慮翼翼小心佳譽益著乃食其報既壽且
康福祉駢集御事之光生榮死哀膺此異數匪人之為
實天所付孰曰泉室而日閭然有銘在石昭千萬年

夫人陳氏墓誌銘

天順二年冬十月宣府守臣武強伯楊公走書京師抵予曰哀子能無似粗效犬馬之勞至有今日深惟母氏鞠育之恩祿不逮養抱此無涯之戚往者朝廷推恩已贈夫人茲欲為不朽之圖敢抒情素於大君子之門觀惠然以銘諸墓予重其言而從之夫人姓陳氏世家陝西漢中父諱真漢中衛百戶母某氏封安人夫人性溫厚莊恪善女工自幼為父母鍾愛比長擇所宜配曰非

佳士不可時名家子楊宗禮有鄉曲之譽以媒通焉遂
受夫人於陳氏之廟而歸於正室夫人曰吾聞婦道之
良惟孝敬勤儉而已自是事姑惟謹凡敦年卮匱用不
敢假與不敢私閨儀肅整不少怠紡績補綴不憚寒暑
衣食自御不厭粗惡姑喜謂人曰自新婦入門吾心未
嘗不樂也未幾姑喪哀毀幾絕歲時脩祀如事其生子
能初事家人產業夫人教之曰人生天地間不見用於
時非男子也能自是從其伯父昌平侯洪立戰功朝廷

嘉之累官都督又自邊城用薦者入統京營兵天順改
元皇上復位特命佩鎮朔將軍印鎮宣府威聲震懾與
昌平相望遂膺爵封實夫人義方之所致也夫人之沒
景泰辛未二月十四日距生洪武辛酉十一月十三日
享年七十卜塋于京城坤隅釣魚臺之原朝廷賻祭之
儀甚厚宗禮以能貴受封榮祿大夫都督同知子男一
即能也女一適都指揮劉政孫男幾人女幾人銘曰猗
嗟夫人漢中之秀榮祿之妻武強之母桓桓武強為國

虎臣義方之訓孰如夫人生榮死哀匪幸之會我銘其
藏百世無廢

太宜人李氏墓誌銘

太宜人李氏諱道賢武略將軍温州衛千戶某之女少
保戶部尚書無武英殿大學士黃文簡公淮之次室太
常少卿采之母就養於京餘二十年忽一疾而殞采悲
痛毀形來請塋銘予重文簡公為先達采又從事館閣
中銘不可辭按其鄉人主事鍾清狀太宜人父母蚤亡

有內戚王夫人者憐其幼且孤而育之太宜人天性仁
孝遵王氏壺範未嘗少怠而織紉剪刺之事皆習為之
精於是二姓姻黨交口稱譽無間言時文簡公年四十
無子大為宗祀懼思同里閨女在室者無如太宜人第
慮其生嫌託親故察其意太宜人慨然曰吾孤苦存活
得托君子之門幸矣母夫人聞之喜遂為公以禮納之
正室夫人楊氏嚴而有法太宜人左右承順曲盡禮意
嘗曰詩不云乎夙夜在公寔命不同造物於人自有定

分楊夫人聞其言愛重之由是閨門之內穆如也已而
楊生二子太宜人生一子時人謂一門和氣所召凡楊
所生子撫摩鞠育之勞悉屬太宜人公嘗罹患難十年
時舅姑垂白在堂諸子皆幼復值歲凶太宜人相楊氏
竭力治家不憚清苦滌髓之供未嘗缺乏用是舅姑安
之公既遭遇位望日隆祿賜有餘太宜人儉素如昔雖
有統綺置之弗御平居溫恭不見厲色待宗族有恩馭
童奴無叱咤聲尤惜物命不御魚肉惟蔬食終身子婦

力勸曰幸得微祿足以奉養何乃自苦如此卒不聽曰
吾厭彼而樂此何苦之有米以支翰起家自中書舍人
歷太常少卿為吏部考功郎中時例得誥封其親制嫡
母在者生母不得封朝廷以采之成器實母訓特賜誥
封太宜人蓋優典也太宜人既以子貴心愈謙下或歸
美之輒遜避曰有夫人楊氏在吾何敢當人益賢之卒
天順己卯六月二十三日距生洪武乙丑三月十八日
壽七十有五采扶柩南歸將以某年某月某日葬邑之

德政鄉大羅山之原從夫乖也銘曰嗚呼宜人斯世之
珍早失怙恃托身至親安分不矜恭侍君子淑慎在躬
綏此福履有子言言克舉其官推恩錫命紫誥回鸞不
墜家聲伊誰之力嗚呼宜人百世之式

節婦封太孺人倪氏墓誌銘

南京倪氏本姑蘓著姓而女之出其門者惟孺人淑德
為最盛孺人之父處士某讀書知禮母袁氏閨範甚肅
孺人自幼聰慧父母口授以書輒能記憶克遵女戒未

嘗少違尤精女工凡剪製之事不學而能以故父母特鍾愛之曰吾女性行如此豈可儷凡子邪同郡張處士名豫者早有行義重其鄉媒妁一通曰佳配也即許而歸之孺人既入張氏之門恪執婦道上下咸宜之處士自幸得內助焉閱八年處士以疾卒孺人時年二十有四痛絕復甦重念舅姑年俱八袞二孤尚未成童將何依乎乃黽勉不死於是獨持門戶經理生業躬自紡績不憚勞苦營甘旨以奉舅姑無異夫在時撫訓二子曰

以成立袁氏老而無依亦迎養焉朝夕承順顏色於三親之傍凡佳味暖帛均奉甚腆莫不各得其懽心人謂有子者弗能過也已而相繼以壽終孺人哀毀盡禮安厝得宜歲時奉祀尤謹宗族隣里無不嘆服孺人初見其子益資性穎異意謂必能起家乃遣入京庠為弟子員節縮用度以供從師取友之費益乃奮志力學底于成遂領鄉薦登永樂乙未進士第擢中書舍人陞大理評事受勅命推恩贈父如其官封母為太孺人有司以

孺人守節無玷可厲風俗又上其事詔旌其門曰節婦久之益為翰林脩撰進侍讀學士為講官知制誥大獲時譽鄉人咸曰微孺人之力不及此未幾益扈駕北巡死於難孺人聞之曰吾兒得死所矣吾何憾動履如常時優游太平之世又十有五年而卒天順七年七月二十日也享壽八十有五生子二人長即益次曰晉孫男四人長曰翻次曰昶中書舍人次曰翔次曰翔太學生孫女四人長適晉州知州鄒和次適鄉貢進士周宗次

適中書舍人朱奎一幼在室曾孫男五人女二人卜以
是年某月某日塋于某山之原嗣奉孺人行狀乞予銘
銘曰嗚呼孺人為妻而宜為婦而孝為母而慈張氏之
門孺人大之獨食其報匪天所私家山之原新塋是基
我銘以貞千載弗隳

贈文林郎監察御史韓君孺人徐氏合塋墓誌
銘

天順改元之明年春朝廷大施曠典推恩臣下有父母

七十之上者越例先封贈之因存以及其亡惟時監察御史韓槃有母與焉鄉人以為喜謂千載之一遇者不數日訃聞忽至槃不勝其慟鄉人又以為悲嗟夫浹旬之內倏喜倏悲如此人生於世其果無異於白駒之過隙矣乎槃抱哀捧親之狀踵予舍以告曰不肖既失怙矣幸母氏之存方少伸祿養而又棄背實不能堪計惟不朽之圖在銘惟鄉先達有以惠之則存沒之感寧有既乎予不能辭按狀槃之父諱昱字永輝世居彰德之

安陽曾大父諱有昌隱居不仕大父諱性之仕元為萬戶父諱獻洪武間用薦為陰陽正術生子四人永輝行第三少有大志以家素業儒因從鄉先生遊窮理之餘始為舉子學永樂庚子年踰弱冠遂領鄉薦中乙榜授陝西米脂縣學教諭其為教也嚴而有法弟子多所造就以宣德己酉三月十一日終于官距生洪武庚申某月某日得年三十有八生徒皆哭失聲為之心喪焉以槩故贈文林郎監察御史配徐氏為孺人孺人訓導伯

詔之女自幼為親所鍾愛洎歸韓氏時姑嫜在堂孝養
惟謹而待姻族禮意周洽稱之者無間言既孀居綜理
家政撫育諸孤皆有道守節凡三十餘年方恩命及門
而一疾逝矣實天順戊寅二月九日也距生洪武己巳
十月十日享年七十子男二長曰榮嗣祖業為陰陽正
術次曰槃雲南道監察御史女三長適卜林次適千戶
張銘次適王英孫男四女七邑城之西孫平村之原其
宅兆也槃將歸而合窆之銘曰師道之良宜壽之長胡

彼善人中道而戕較之子淵歲已多六况其門墻顯有
私淑越配之貞誓死靡更撫其遺孤而底于成惟理之
常宜食其報數莫移兮徒爾增悼嗟嗟伉儷無嘒于斯
裕垂後人顯庸於時平村之原有封夏屋考石之銘喟
然弔弔

孺人西昌蕭氏墓表

西昌大族有蕭氏焉今封翰林編脩尹君之室孺人其
裔也孺人曾大父斯萬大父安節父德晉皆隱士母王

氏生孺人自幼淑慧善女工早失所怙母氏鍾愛之宗賢先生其外祖也嘉其不凡授以孝經烈女傳即能背誦通大意聞說古今人成敗善惡報應事暗記不遺暨笄乃擇配時同邑著姓尹氏子源有子奐重行義甚高咸曰斯人非蕭女為配不可於是孺人歸焉即封君也時姑已早亡孺人至即能綜理家業凡取予應酬悉有條理若素練者親族初以為年少至是咸驚異之子源先以薦入館閣預脩永樂大典書成授福清河泊官便

道過家賀客皆至倉卒應待饌具未嘗不精子源喜曰
起吾家者必新婦也子源有子五人封君居行之四孺
人處妯娌間善則推之咎則引之用是舉無乖戾視諸
子姪均一無間季弟振重幼孤孺人為之娶室置產無
一毫德色恒以不逮養姑為恨尤重親黨見貧乏者至
輒衣食以賑之遇婢僕以恩義上下之間無有不得其
懽者封君嘗坐累臺院往來道途間十餘年孺人持守
門戶卒賴以濟家業不至於衰平居志向勤儉澣縫之

事雖老不倦所御之服雖弊不忍釋見子直穎秀延師教之日望其成得一異味必留之曰為吾兒奉師也洎直弱冠乃遣入邑庠遂登景泰甲戌進士第選入翰林為庶吉士擢編脩天順己卯賜勅命孺人遂受今封初孺人就養京邸宿疾稍作及封君詣闕謝恩得團藥者數月孺人之疾不減乃偕南還就醫道次星子縣卒於舟中是歲十一月十二日也距生洪武庚辰二月十八日得壽六十子男一即直也女二人長適蕭仲昇次適

毛仲練孫男女各一人卜以其年十一月三十日塋邑
之江背壠之上嗚呼孺人起尹氏之家可謂賢矣予承
乏翰長而直以籀屬相好故特表其墓以勸世之為人
婦為人母者

故妻贈夫人黃氏墓誌銘

故妻姓黃氏諱淑靜世為將家高祖某曾祖某祖某俱
某衛指揮僉事父某族之彥俊者母周氏生四女夫人
其季也自幼性慧為父母鍾愛方四歲會予於姑之家

姑曰此良配也時以為戲言又數歲為宣德改元予入
郡庠為諸生擇婚未成壬子秋領鄉薦明年登進士第
又明年始委禽於黃氏正統改元予官吏部驗封主事
明年予父母聘夫人於家送至京邸居一歲生子一見
而亡嗚呼悲哉予入仕之初官况蕭然凡百所需未有
不缺夫人既主中饋綜之理之不遑寧居清苦勤儉不
數月間家用視前十增六七俾予無內顧憂奈何命之
不淑遂至失偶夫人不慮其死第顧予度日之艱難至

彌留猶惓惓焉死之日正統二年三月某日也距生永樂八年某月某日得年二十有八子名鎖住乳婦四易而成甫四歲能誦古歌詩賓至即拜跪應對能典謁矣忽一疾而夭造物者於夫人母子亦何毒之甚邪又踰年歸夫人之櫬於鄧州為壙於城南之左依舅氏之阡夫人初贈安人再贈宜人再贈淑人今加贈夫人累膺恩典光賁泉扃雖嗇於壽而淑德不泯為之銘曰脩短不齊冥冥有定情不能堪付之於命百年瞬息曾莫之

殊銘以藏之終古不渝

誌兒鎖佳文

兒鎖佳李姓未有名賢之子也甫四歲以疾死賢由進士任吏部主事之明年家嚴與姊送黃氏于京師官舍為予室丁巳之五月也明年三月十二日生兒母生兒未見即亡兒鞠于乳婦一周歲五易其氏矣予既續周氏始克鞠兒于家漸能飲食再周歲頗能言悅人意俾予不能怒稍又能拱揖跪拜客至必見教之詩誦數十

篇舉止有老成態予與婦鍾愛日加樂無既也三周之前十五日兒嬰疾便指腹向父母言若有憂色醫者三四更而藥不中證過周之七日兒疾亟視父母淚盈眵睫不能言又明日夜乃死嗚呼兒鎖住何遽去吾而死也汝生而母亡人皆謂汝異凡必能成立未四歲而性慧人又謂汝後必能承家予亦自負如是嗚呼兒鎖住何遽去吾而死也死之旦具衾棺出化化之時始見其疾脾也脾之疾此地小兒多有能瘳者什伍兒鎖住治

非其法竟以此亡嗚呼予齒三十四矣止一兒又死獲何罪于天而報之如是或者命數適然天固不能短長於其間然情之所鍾孰能已予之悲乎因誌其墓骨之處以記歲月云

壙誌

奉天翊衛推誠宣力武臣特進光祿大夫柱國
太平侯追封裕國公謚勇襄張公壙誌

公諱軌姓張氏河南開封之祥符人父榮國公王是為

河間忠武王母王氏河間王夫人長兄太師英國公輔
是為定興忠烈王文安伯輓其仲兄也永樂中公以勲
戚侍太宗皇帝授錦衣衛指揮僉事洪熙元年仁宗皇
帝嗣位恩賚有加特陞指揮同知宣德改元漢庶人作
亂宣宗皇帝親率六師討平之公扈從有功賞予甚厚
仍給世襲誥命正統甲子今上以北敵未靖命成國公
朱勇往征之公為前行首敗敵於白城復追至羶帽山
敵悉衆來戰公奮擊之敵龍鬣而潰斬馘甚衆凱還以功

陞指揮使又用薦陞都指揮僉事典禁兵未幾復署僉
前軍都督府事尋即真時麓川賊子思機發復為亂上
命將往討以公副之既至分道並進一鼓就擒師還至
荊州復命公移師貴州以討叛苗會景泰改元遣使詔
還以麓川功陞右都督總京營兵天順元年上居南宮
公奉上聖皇太后勅符與太監曹吉祥忠國公石亨暨
兄輓等協力擁戴迎上復位論功行賞進封公奉天翊
衛推誠宣力武臣特進光祿大夫柱國太平侯食祿二

千石賜以誥券寵賚之厚莫與為比仍官子瑾為錦衣衛指揮同知是年冬公上疏曰臣犬馬之年六十有五筋力日衰乞解兵柄以全晚節上方倚公不允二年春公得疾上即命御醫往療屢遣中貴人視公賚與頻繁已而疾愈劇公復力疾上疏曰臣年命乖蹇藥不奏功旦夕待盡惟聖明為宗社生民計選賢任能以圖至治臣即瞑目地下矣他一無所請上覽之惻然復命公勉進藥餌以副眷念命下而公已卒是年三月十六日也

距生洪武癸酉九月二十九日享壽六十有六訃聞上深
哀悼素服罷朝斂日即遣官諭祭喪塋賻贈之儀悉從
優等追封裕國公謚勇襄配劉氏繼吳氏俱封太平侯
夫人生男一即瑾卜塋都城之南蘆溝橋之西從先兆
也公儀貌雄偉負氣剛直以智畧雄人視古之名將不
多讓也其勛績行實之大者將刻銘神道而此特列其
槩置玄堂云

古穰集卷十八